



廣名將傳卷十三

古閩黃道周石齋註

尹繼倫

尹繼倫開封浚儀人父勲爲郢州防禦使嘗內舉繼倫以爲可用太宗卽位以從征太原功使充北面緣邊都巡檢使端拱中契丹潛入寇上遣李繼隆護送輜重數千乘契丹將于越謀知之率精銳數萬騎將邀于路繼倫適領兵遊徼路與寇直于越徑趨大軍過繼倫軍不

顧而去繼倫謂其麾下曰寇蔑視我爾彼南出而捷還則乘勝驅我而北不捷則亦洩怒于我將無遺類矣爲今日計但當捲甲啣枚以躡之彼銳氣前驅不虞我之至力戰而勝足以自樹縱死猶不失爲忠義豈可泯然而死爲胡地鬼乎衆皆憤激從命繼倫令軍秣馬伺夜人持短兵潛躡其後行數十里至唐川徐河天尙未明于越去大軍四五里會食訖將戰繼隆方陣于前以待繼倫從後忽擊殺其將皮室一人皮室者契丹相也皮室被殺衆遂驚潰于越方食失箸爲短兵中其臂創甚

乘善馬先遁寇兵隨之大潰蹂殘死者無數契丹自是  
不敢窺邊每相戒當避黑面大王以繼倫面黑故也以  
功領長州刺史至道二年分遣將帥五道以討李繼遷  
上疑李繼隆逗遛不進急召繼倫至京師授靈慶副都  
部署欲以夾輔繼隆時繼倫已被病強起受詔上素聞  
其嗜酒以上尊酒賜而遣之卽日赴行營僅至慶州卒

斷曰

尹子繼倫領軍巡徼繼隆擁輜于越欲擾兵過尹前  
視之如草繼倫怒噴激衆共討俟其前驅忽從後搗



斬相皮室于越驚倒臂中短兵萬馬奔跑潰兵蹂躪  
死者不少黑面大王戒避須蚤再奉詔行奈命不保

### 狄青

狄青字漢臣汾州西河人善騎射寶元初趙元昊反詔  
擇衛士從邊時偏將屢爲賊敗士卒畏怯惟青願行常  
爲先鋒凡四年前後大小二十五戰中流矢者八破金  
湯城畧宥州屠囉咩歲等族燔積聚數萬收其帳二千  
三百生口五千七百又城喬子谷築大郎等堡皆阨賊  
要害嘗戰安遠被創甚聞寇至卽挺起馳赴臨敵披髮

帶銅面具出入賊中皆披靡不敢當尹洙爲經畧判官  
青見之洙與談兵善之薦于經畧韓琦范仲淹曰此良  
將材也二人見而奇之待遇甚厚仲淹以左氏春秋授  
之曰將不知古今匹夫勇耳青折節讀書由是益知名  
青奮起行伍十餘年而貴是時面涅猶存帝嘗敕青傳  
藥除字青指其面曰陛下以功擢臣不問門第臣所以  
有今日由此涅耳臣願畱此以勸軍中不敢奉詔皇祐  
中廣德州蠻儂智高反陷邕州嶺南騷動師久無功敕  
孫沔余靖爲安撫使討賊猶以爲憂青因自請于帝曰

臣起行伍非戰伐無以報國願得蕃落騎數百益以禁  
兵羈賊首於闕下帝壯其言遂除宣徽南院使經制廣  
南盜賊專置酒垂拱殿而遣之時智高還據邕州青合  
孫沔余靖兵次賓州先是蔣偕張忠戰敗軍聲大沮廣  
西黔轄陳曙乘青未至復以步卒八千犯賊潰于崑崙  
關殿直袁用等皆遁青至乃曰令之不齊兵所以敗晨  
會諸將堂上揖曙起並召用等三十人按以敗亡狀俱  
驅出軍門斬之沔靖相顧錯愕諸將股慄已而頓申令  
軍中休十日賊覘者以爲軍未卽進青明日乃整軍騎

一晝夜絕崑崙關出歸仁鋪爲陣賊旣失險悉出逆戰  
前鋒孫節搏賊死山下賊氣銳甚沔等懼失色青執白  
旗麾騎兵從左右翼出其不意遂大敗之追奔五十里  
斬首數千級智高縱火燒城遁去明日檢賊屍有衣金  
龍衣者衆謂智高已死欲以上聞青曰安知非詐耶寧  
失智高不敢誣朝廷以貪功也始交趾願出兵助討智  
高余靖言其可信具萬人糧于邕欽待之詔以緡錢三  
萬賜交趾爲兵費許賊平厚賞之青旣至檄余靖無通  
使假兵卽上奏曰李德政聲言將步兵五萬騎一千赴



援非其情實且假兵於外以除內患非我利也以一智  
高而橫蹂二廣力不能討乃假兵蠻彝貪得忘義因而  
起亂何以禦之請罷交趾助兵從之及賊平人服其有  
遠慮青在樞密四年每出卒輒指日以相矜誇既而出  
判陳州卒贈中書令青爲人慎密寡言其計事必審中  
機會而後發行師先正部伍明賞罰與士卒同饑寒勞  
苦敵猝犯之無一士敢後先故其出常有功尤喜推功  
與將佐始與孫沔破賊謀一出于青賊旣平經制餘事  
悉以諉沔退若不用意者沔始歎其有勇旣而服其爲

人自以爲不如也

斷曰

狄青爲將戰功紛紛帶銅面具所向吸魂朝野名重  
面涅猶存帝命藥去請畱勸軍儂智高反衆敗崑崙  
青怒盡斬突出關門賊出不意大敗而奔高死未確  
不敢妄聞智高一叛青已早論破之亦易何假于人  
賊平之後方服其神

种世衡

种世衡字仲平放之兄子也少尙義節昆弟有欲析其

資者世衡盡推與之惟取圖書而已以放蔭補官時西  
邊用事守備不足世衡因建言延安東北二百里有故  
寬州請因其廢壘而興之以當寇衝右可固延安之勢  
左可致河東之粟北可圖銀夏之舊朝廷從之命董其  
役夏人屢出爭而世衡且戰且城之然處險無泉議不  
可守鑿地百五十尺始至於石石工辭不可穿世衡卽  
命屑石一畚酬百錢卒得泉城成賜名青澗城遷內殿  
崇班知城事遂開營田二千頃募商賈貸以本錢使通  
貨贏其利城遂富實間出行部族慰勞酋長或解與所

服帶嘗會客飲有得敵情來告者卽以飲器與之由是屬羌皆樂爲用再遷洛宛副使知環州蕃部有牛家族奴訛者素崛強未嘗出謁郡守聞世衡至遽郊迎世衡與約明日當至其帳勞其部落是夕大雪深三尺左右曰地險不可往世衡曰吾方結諸羌以信不可失信遂緣險而進奴訛方臥帳謂世衡必不能至世衡蹙而起奴訛大驚曰前此未嘗有官至吾部者公乃不疑我耶率其族羅拜聽命又羌長慕恩部落最強世衡嘗夜與飲出侍姬以佐酒旣而佯起入內潛於壁隙窺之慕恩



竊與侍姬戲語世衡遽出掩之慕恩慙懼請罪世衡乃笑曰君欲之耶卽以遺之由是得其死力諸部有二者使討之無不克其後百餘帳皆自歸因令諸族置烽火有急則舉燧介馬以待葛懷敏敗率羗兵數千人以援涇原無敢後者嘗課吏民射有過失射中則釋其罪有辭某事請某事輒因中否而與奪之人人自勵皆精于射由是數年敵不敢近環境范仲淹檄令與蔣偕築細腰城世衡時臥病起將所部甲士晝夜興築城成而卒初世衡在青澗城元昊未臣其貴人剛浪陵號野利王

又一將遇乞號天都王皆元昊腹心親信用事欲以謀  
間之未得其隙會剛浪陵令浪埋賞乞媚娘三人詣世  
衡請降世衡知其詐曰與其殺之不若因以爲間遂畱  
以監商稅出入騎從甚寵有僧王光信者趨勇善騎射  
習知畚部山川道路世衡出兵常使爲鄉導改名嵩世  
衡爲蠟書遣嵩遺剛浪陵內言浪埋等已至朝廷知王  
有向漢心命爲夏州節度使俸錢月萬緡旌節已至等  
語令嵩密藏衣中非濱死不得泄別以棗一瓿畫龜一  
幅遺野利以諭其早歸之意剛浪陵得之大懼命執嵩

歸元昊元昊疑剛浪陵貳已召嵩廷詰問書所在嵩堅  
執無有雖甚箠笞不言元昊命曳出斬之嵩乃大號曰  
种將軍密遺野利王書戒不得輕泄今至死不了得將  
軍事卽解衣出書書入元昊遂疑野利陰遣別將假爲  
野利使使于世衡傳野利語世衡審知爲元昊所遣轉  
嫚罵元昊盛稱野利內附之意仍厚遣使者曰爲我歸  
語汝主速決無稽留也使去嵩卽還而野利已報死  
矣世衡知謀已行因欲並問天都王又置祭境上作文  
書于板以弔之多述野利與天都相結有意本朝悼其

垂成而敗之意遺於境上傳聞于元昊並殺天都王遂  
復遣使請降稱臣如舊世衡在邊數年積穀通貨不煩  
縣官大有恩惠及卒羗長朝夕臨者數日青澗及環人  
皆畫像祠之

斷曰

种子世衡少尙氣節有事西邊心盡力竭旣爲築城  
又將泉掘先開營田復貸商業荒涼邊城富如帝闕  
行部慰勞羗長陰結敵帳往還不憚大雪敵感且懷  
拜皆羅列以酒醉之再贈姬妾若有所圖死亦勇決



種類猜嫌因而間別所忌掃除所憎撲滅勢獨歸降  
不生覺孽所以邊庭常清常潔

### 郭逵

郭逵字仲通其先自邢徙洛逵始隸陝西范仲淹麾下  
仲淹方議取靈武逵曰地遠而食不繼城大而兵不多  
未見其利未幾涇原任福以全軍没人服其先見陳執  
中安撫京東奏逵爲駐泊將執中嘗與賓佐論當世名  
將共推葛懷敏逵曰懷敏喜功徼幸徒勇無謀易與耳  
他日必敗朝廷事執中歎曰君直知兵已而懷敏果覆